

修武縣志卷六

修武縣知縣馮繼照纂輯

祠祀志

寺觀附

治民事神無二理也民可近不可下神可遠不可褻皆以吾心之敬行之敬盡則物盡外則備物內則備志書曰享多儀儀不及物曰不享惟不役志於享蓋言敬也我

朝會典所載令有司各立壇廟以歲時奉祭祀有人民有社稷守土者宜何如肅裡將事以答神庥而乃執事不恪犧牲不必其肥腴粢盛不必其豐備神何享焉卽有賢邑宰起而修明之而牲幣之數

修武縣志

卷六

祠祀志

一

升降之儀有猝難講求者謹遵會典所載詳列於篇而境內之琳宮梵宇不在祀典者另附於末蓋不敢以淆秩祀云爾

社稷壇 在城西北

禮部則例一凡直省府州縣各擇爽塏之地建社稷壇均北向歲以

春秋

仲月上戊日爲民祈報府州

縣皆正印官將事以各學教官糾儀生員充禮生儀注

每神位前各帛一鉶二簋三簋三籩四豆四爵三共羊一豕一尊一祭日雞初鳴承祭官以下咸朝服齊集黎明贊引禮生二人引承祭官詣盥洗所

盥洗通贊禮生贊執事各司其事贊引者引承祭
官至階前拜位立引班禮生二人分引陪祭官文
東武西各就拜位序立乃迎神贊引者引承祭官
升壇詣香案前司香跪奉香承祭官三上香復位
行三跪九叩禮陪祭各官皆隨行禮奠帛初獻爵
司帛奉篚進跪奠篚司爵奉爵進獻爵奠正中皆
退司祝禮生至祝案前跪承祭官暨陪祭各官皆
跪司祝讀祝畢詣
神位前跪安於案叩如初退承祭官暨陪祭各官
行三叩禮亞獻爵奠於左終獻爵奠於右均儀如
初獻乃徹饌送

修武縣志

卷六

祠祀志

二

神承祭官行三跪九叩禮陪祭各官皆隨行禮司
祝奉祝司帛奉帛送瘞所承祭官轉立拜位西
東面候祝帛過復位引至望瘞贊引告禮成引退
眾皆退

祭文

惟神品物資生烝民乃粒養育之功司土是賴惟

茲秋 春仲式陳明薦尚饗

先農壇 在縣東南一里許正宇三間配房東西各
一間神倉一間大門一座東西角門各一座雍正
五年知縣陳綱奉

旨建

禮部則例直省耕藉雍正四年議準奉天直隸各省於該地方擇地爲藉田以雍正四年爲始每歲仲春府尹督撫及府州縣衛所等官率所屬耆老農夫行耕藉禮該督撫將設立藉田畝數報明戶部禮部存案五年議準直省各擇東郊官地潔淨豐腴者立爲藉田如無官地動支帑銀置買民田以四畝九分爲藉田每歲耕藉之日祭先農禮畢各官咸易蟒袍補服州縣正印官秉耒佐貳執青箱播種專城衛所正印官秉耒如無屬員卽選擇耆老執青箱播種耕時用耆老一人牽牛農夫二人扶犁悉照九卿之例九推九返農夫

修武縣志

卷六

祠祀志

三

終畝耕畢各率耆老農夫望

闕行三跪九叩禮其農具用赤色牛用黑色箱用青色所盛籽種各從其土之宜卽著守壇農夫灌溉田地方官不時勸課將每年所收米穀及用過粢盛數目造冊報布政司送戶部核實至各省耕藉日期每歲十一月

頒時憲書後交欽天監擇日由部奏請

欽定通行奉天府尹直隸各省督撫轉飭所屬同日舉行永著爲令

祭文

惟神肇興稼穡粒我烝民頌思文之德克配彼天

念率育之功陳常時夏茲當東作咸服先疇洪惟九五之尊歲舉三推之典恭膺守土敢忘勞民謹奉彝尊聿修祀事惟願五風十雨嘉祥恆沐於神庥庶幾九穗雙岐上瑞頻書於大有尙饗

文昌祠 在東門外書院東 又有文昌閣在東關路上康熙三十二年懷慶府通判署修武縣事陳芳猷建有碑記 又有文昌閣在百家巖漢獻帝避暑臺上邑人趙敏建有碑記

每歲二月初三日八月奉
頒日期有司致祭嘉慶六年奉
敕用太牢

修武縣志

卷六

祠祀志

四

春秋祭品

關帝廟同

帛一

色白

牛一

羊一

豕一

籩十

豆十

儀注

關帝廟同

祭日贊引生引承祭官進左旁門至盥洗所贊盥洗盥洗畢引至殿內行禮處立典儀倡執事者各司其事贊引贊就位引承祭官就位立典儀倡迎神司香者捧香盒就香鑪左邊立贊引引承祭官就香鑪前立司香者跪贊引贊上香承祭官舉香插鑪內又上塊香三次畢贊引贊復位立贊引贊跪叩興承祭官行三跪九叩首禮典儀倡奠帛爵行初獻禮捧帛爵者將帛爵捧進

神位前奠帛者跪獻畢行三叩首禮退執爵者立獻畢退讀祝官詣安祝文卓前行一跪三叩首禮捧起祝文立贊引贊跪承祭官讀祝官俱跪贊讀祝讀畢捧至

神位前跪安盛帛盒內畢行三叩首禮退贊引贊叩興承祭官行三跪九叩首禮立典儀倡行亞獻禮執爵者照初獻禮獻畢退典儀倡行三獻禮執爵者至案右邊照亞獻禮獻畢退典儀倡徹饌倡送神贊引贊跪叩興承祭官行三跪九叩首禮立典儀倡捧祝帛饌各詣燎位捧祝帛香饌者至神位前俱跪捧祝帛者行三叩首禮捧香饌者不

修武縣志

卷六

祠祀志

五

叩首將祝帛香饌依序捧送承祭官退至西旁立候捧祝帛者過畢復位立贊引贊詣望燎位承祭官至燎鑪前焚訖揖贊引贊禮畢退

祭文

惟帝神功赫弈聖德昭明位分天象職司台衡朱衣赤舄耀於七星贊元開化啟秀育英普天欽仰斯文丕興今屆仲春秋虔薦豆登尚饗

文昌後殿 祀追

封三代公與前殿同日致祭

春秋祭品

關帝後殿同

帛各一

色白

羊各一

豕各一

籩豆各八

儀注

關帝後殿同

行二跪六叩禮餘同前殿

文昌三代祭文

惟帝祭引先河之義禮崇反本之思矧夫世德彌光延賞斯及祥鍾累代炯列宿之精靈化被千秋緯人文之主宰是尊後殿聿答前庥茲屆仲春將祀事用申告潔神其格歆尚饗

秋

肅

郡判陳芳猷勅建文昌閣記

略云余不佞兩攝修邑親政之暇環視城郭見廢墜缺略者難以枚舉最甚者莫如東關居民寥落望若晨星城垣無壁壘井竈半墟邱良可慨歎夫

修武縣志

卷六

祠祀志

六

震爲生氣巽象文明東方震巽之位奎壁之星應焉今頽廢若此宜乎邑人之不克振拔也訪之耆老言東關舊有文昌閣今土阜卽其故址閣存之日煙火千家室廬鱗次科甲蟬聯後先輝映自毀於前明之季六十年來有逃徙而無生聚土著者遷安問流寓物換星移凋敝遂至於此余聞之瞿然夫善始者不必其善繼善謀者不必其善成前後若相需也爰進僚員洎二三子衿而謀之曰諸君止爲我監督工役金錢口食之需吾任之於是剋日興工經營程度凡埏埴樸斲之匠役與塗暨丹牖之顏料修武所不能備者槩取諸郡城不

不責有於無亦且不取精於麤也築務期堅好棟宇必令美觀崇臺聳峙傑閣崢嶸帝像莊嚴門屏暢爽固圻然東隅之巨瞻也自是而相我文明福我黎庶更與易所謂重門設險義有合焉詎非一舉而三善備歟是役也起於康熙三十二年二月成於本年四月

縣貢生趙敏勅建百家巖文昌閣記

略云憶昔戊申歲敏從先侍御讀書百家巖寺書室之右峯巒壁立高十丈許曲徑蜿蜒盤折而上有臺址平如几案布席可坐數十人相傳以爲漢獻帝避暑樓雖棟宇滅沒而規模彷彿可想先侍

修武縣志

卷六

祠祀志

七

御輒攀緣登陟低回流連不能去語敏曰是臺踞招提之上西望瀑布奔流崩雲捲玉東望梵宇參差星布棊列又有水泉灑灑檀欒掩映登斯臺也百巖勝槩不下席而盡收目中且斯臺高不及行山之半而遙望縣治城郭廬舍田園錯比或遠或近隱現出沒於指顧閒一邑風脈所關其在於斯異日建帝君閣於此而烝嘗之吾邑文運必有蔚然丕變者乎歲壬辰敏攜友人輩復遊百巖縱步徘徊極目遠睇而先侍御疇昔之言不覺有觸懷因具以白寺僧筮吉鳩工度地而經營之凡棟楹瓴甃工匠傭值之費悉捐己資起工於二月十

七日乙丑告竣於四月十五日壬戌高不踰尋廣
不過數武然俯視一切燎若指掌又何必棖桷峻
嶒輪奐玆璣而後謂之閣也哉

關帝廟 在縣治西明萬歷十一年知縣趙可學建
雍正元年追封三代爲公知縣陳綱建祠於廟後
道光七年知縣鄒光曾重修 又有縣衙關帝廟
在譙樓後係舊縣署儀門外轉東地基

每歲 春秋 二仲月奉

頒日期及五月十三日有司致祭雍正年間奉
敕用太牢典禮與祭文昌同

五月十三日祭品

修武縣志

卷六

祠祀志

八

帛一 色白 牛一 羊一 豕一 果五槃

祭文

惟帝浩氣凌霄丹心貫日扶正統而彰信義威震
九州完大節以篤忠貞名高三國神明如在徧祠
宇於寰區靈應丕昭薦馨香於歷代屢徵異蹟顯
佑羣生恭值嘉辰遵行祀典尚饗

關帝後殿 祀追

封三代公與前殿同日致祭

光昭公正中南向

裕昌公東一室南向

成忠公西一室南向

關帝三代祭文

惟公世澤貽庥靈源積慶德能昌後篤生神武之
英善則歸親宜享尊崇之報列上公之封爵錫命
優隆合三世以肇禋典章明備恭逢諏吉祇薦馨
香尚饗

修武縣知縣鄒光曾重修關帝廟記

略云修武 關帝廟建於縣治之西南與文廟相
接也基址隘狹制度未宏曾莅任後瞻謁之下爰
進闔邑紳耆謀所以擴新之僉以爲宜旣捐廉爲
倡邑士民商賈咸樂輸恐後因鳩工庀材三閱月
而告成計重修廟閒舞樓三閒後殿三閒拜殿三

修武縣志

卷六

祠祀志

九

閒東側對廳三閒道院迴廊量加修飾添建廟前
角門二座正殿東廂屋三閒廂屋前南向屋一間
月臺甬路廟墀竝甃石甃砌以及垣牆階級修整
完善是役也朽者易之敝者新之樸陋者壯麗之
規模宏闊體制尊嚴士民共相鼓舞而識神所憑
依也是爲記道光七年仲秋月

奎光閣 在東關與 文昌祠同日致祭祭品同後
殿行兩跪六叩禮

祭文

惟神七星冠首六合承輝德耀青陽祐人才之奮
起祥開紫電煥文運之光昌天象照臨士林忭慶

敬修裡祀肅殿微忱尙饗

名宦祠 在學宮戟門東明萬歷中知縣趙可學建

國朝康熙六年知縣仇鳳翀重修乾隆五年知縣劉

建吉重修道光五年知縣鄒光曾卽戟門東偏更

衣所南嚮三楹改建

祀修武職官漢令陳蕃宗慈元尹閻珪主簿李鐸

明知縣冷宗元教諭郝嶙

舊祀周衛大夫甯俞國朝總督三省朱昌祚

巡撫吳景道佟鳳彩總督三省李廕祖巡撫尹會一今竝遷改

鄉賢祠 在學宮戟門西明萬歷中知縣趙可學建

國朝康熙六年知縣仇鳳翀重修乾隆五年知縣劉

建吉重修道光五年知縣鄒光曾卽戟門西偏齋

修武縣志

卷六

祠祀志

十

戒所南向三楹改建

祀漢祭酒張範桂陽太守衛颯晉侍中向雄尙書

苟晞宋曲江縣侯向靖魏安平公張蒲元布衣張

宏毅吏部尙書薛澍翰林院編修逮魯曾明西安

府知府王懋蔚州知州姜鄙九江府通判范繼仁

崞縣知縣馮杞

國朝兩浙鹽運使范正脈刑部主事成觀光廣西道

監察御史趙旭

明教諭王時春譔知蔚州姜鄙崇祀鄉賢記

略云邑侯趙公來治修之明年奉督學憲副衷公

檄修復鄉賢以表章先哲風勵後人公僉卜輿論

得鄉科任蔚州知州進階中順大夫姜先生鄩歷任行實表上會衷公總憲荆湖事寢歷三年復上憲副容公申勦再三而事始定遂鳩工聚材建祠於學宮之後而姜先生祀焉顧元宋而上諸先生德業行誼彪炳志牒勿論已乃寥寥二百年間名卿顯宦獨姜先生以賢祀豈偶然哉嘗讀先生撫蔚去思碑載傅文玘等千餘人赴闕泣畱及修堡功事見於太常董公碑侍御韓公疏至今照耀人耳目解組歸以禮致仕終始無少虧玷嘗詢諸邑學士咸稱先生居謙守默恂恂如也至論國家事可否屹然有萬人獨往之勇所遺祭義二田光祖

修武縣志

卷六

祠祀志

十一

洽族今猶存焉夫以彼官守之德業而居鄉行誼又如此以祀鄉賢宜也然非邑侯之賢孰與祀之嗣是修武人士觀感而興起者皆趙侯所激勸矣公諱可學號至吾任縣人其所爲善政難縷述因鄉賢祠成特舉而記之用志不怠云

縣舉人吳周聚譔王玉鉉路坦然宜祀鄉賢議

王先生諱玉鉉號太阿明萬歷丙午科解元著清水篇行世先生力持名教有締交某文優於德門庭間有不順意先生沐手焚香書孝字如斗大緘紙百層每層俱書祕拆友接書凜然拆終見字如水澆背不啻嚴師在上而躬受扑責也由是祇肅

所事迄無慚德因跽謝先生其誠意感人如此丙午科十五省榜首先生名最著魏闈密使人通之謂會狀可立致時公主擇配先生胞弟某在選列又以尚主許之先生愕然曰窮達數也柰何以不入耳之言聞於我哉緩詞謝之托疾不入闈與弟束裝旋其立身千仞而又明哲自保如此王先生後又得路先生先生諱坦然字人路事親孝事繼母無豪髮殊友于兄弟至今吾邑稱敦睦者曰有路家風教人修好者曰何不聞路氏兄弟乎先生讀書明大義不屑屑章句學崇禎癸未獲捷而甲申遭變先生時仰天而歎俯首而哭卽熟與居者

修武縣志

卷六

祠祀志

十二

莫得其顏之喜而惟見其容之戚也顧先生未嘗自明其意人亦不能測其淺深兩先生制行卓卓不可湮沒使其祀於鄉得享春秋之祀足令懦立頑廉振綱常而挽頽風矣予恐久之而兩先生之行誼竟歸泯滅也因援筆而記之

忠義孝弟祠 在學宮崇聖祠後雍正六年知縣陳綱建道光十五年知縣馮繼照重建

祀元孝子員思忠明孝子馬恂辭復亨義民王忠周公直聶文秀朱成辭文濟

教諭張宗泰重建忠義祠碑記

修武忠義祠居學宮之左南與崇聖祠毘連

國朝自雍正六年令君陳 建修以來經今百有餘
歲矣風雨之所飄蕩 之所剝蝕牆壁崩頽棖
桷腐敗非所以妥神靈而奠忠義之魂也歲在道
光乙未秋商之馮菽橋明府明府慨然身任其事
籌款爲興復計屬邑庠生秦懷西梁悅孔董其役
始事於丙申二月之望越四旬而葺事共用制錢
百十有五緡基址悉仍其舊而瓴甃木石一一皆
就平地築起牆垣鞏固瓦縫密比黝堊丹雘咸以
法人功之勤視舊有加而氣象乃屹然改觀焉抑
予更有說焉者修武自道光元年以來節婦烈女
後先相望蓋不過十餘年間已得四人而男子之

修武縣志

卷六

祠祀志

十三

以義行著稱里黨者乃或至百數十年之久而闐
然蔑有聞焉豈世有其人而事蹟湮滅不彰歟抑
所以作興而獎厲之者無其道歟然則斯祠之修
葺乃一邑人心風化之所關是不可以無述乃萃
其事之始末而爲之記

節孝婦女祠 在縣署東雍正六年知縣陳綱建

祀姜秦氏李秦氏金趙氏劉張氏師王氏王姜氏
薛王氏陳董氏秦馬氏路邱氏傅薛氏馮李氏郜
趙氏薛李氏趙劉氏薛張氏范岳氏楊菊姐龐徐
氏道光十三年彙請生存已故節孝總坊建於祠

門外坊載劉周氏等共二百十二口

祥輿地
志坊表

名宦鄉賢忠義節孝四祠俱丁祭日祭祭品儀注

與兩廡同

詳見
學校

名宦祠祭文

惟靈澤媿龔黃功深召杜德在生民宜馨俎豆茲

值仲

春秋

理宜致祭尚饗

鄉賢祠祭文

惟靈名高朝宁德重鄉邦宮牆正位祀典用光茲

值仲

春秋

理宜致祭尚饗

忠義孝弟祠祭文

惟靈稟賦貞純躬行篤實忠誠奮發貫金石而不

渝義問宣昭表鄉閭而共式祇服懋彝倫之大性

修武縣志

卷六

祠祀志

十四

摯莪蒿克恭念天顯之親情殷棣萼模楷咸推夫

懿德

恩綸特闡其幽光祠宇維隆歲時式祀用陳簠簋來格

几筵尚饗

節孝祠祭文

惟靈純心皎潔令德柔嘉矢志完貞全閨中之亮

節竭誠致敬彰閭內之芳型茹冰蘖而彌堅清操

自勵奉盤匝而匪懈篤孝傳徽

絲綸特沛乎殊恩祠宇昭垂於會典祇循歲祀式薦尊

醪尚饗

神祇壇 在城西南

會典直省府州縣風雲雷雨山川詣神仲月諏

春秋

吉日致祭雍正三年議準直省府州縣神祇壇設雲雨風雷位於中設

山川位於左稱某府州縣境內山川之神設

城隍位於右稱某府州縣城隍之神

祭文

惟神贊襄天澤福佑蒼黎佐靈化以流形生成永賴乘氣機而鼓盪溫肅攸宜磅礴高深長保安貞之士憑依鞏固實資捍禦之功幸民俗之殷盈仰神明之庇護恭修歲祀正值良辰敬潔豆籩祇陳牲幣尚饗

修武縣志

卷六

祠祀志

十五

邑厲壇 在城北

會典直省府州縣歲清明節七月望日十月朔日祭厲壇於城北郊前期守土官飭所司具香燭公服詣城隍廟以祭厲告本境城隍之神黎明禮生奉請城隍神位入壇引守土官公服詣神位前跪興如儀退禮生仍奉城隍神位還

祭品

羊三 豕三 飯米三石

祭文

爲祭本縣闔境無祀鬼魂事竊照普天之下后土之上無不有人無不有鬼人鬼雖殊其理則一念

幽冥中無祀鬼魂其間有遭兵刃而橫死者有遭
刑禍而瘐死者有遇猛獸毒蟲而傷死者有遇天
災流行而疫死者有危急自縊而死者有疆場戰
敗而死者有牆垣倒塌覆壓而死者有衣食缺乏
凍餓而死者有渡河而淹死者有登高而跌死者
此等鬼魂或終於前朝或歿於近世或背鄉離井
作客捐生或斷子絕孫無人致奠爲祀典所不載
竝姓名之難稽精魄未散久血爲燐依草附木興
妖作怪呻吟於星月之下號哭於陰雨之中心思
陽世魂杳杳以無歸氣結荒郊意憧憧而苦餒興
言及此慘悽堪憐乃設壇於城北以某月某日置

修武縣志

卷六

祠祀志

十六

備牲醴羹飯專祭本縣闔境無祀鬼魂敬祈尊神
監臨此祭尙饗

城隍廟 在縣治東順治十二年燬於火重修歷五
年工始竣道光十一年知縣趙銘彝重修

知縣趙銘彝重修城隍廟碑記

案邑乘城隍廟在前明洪武丁丑年貳尹卜君祖
望勅建天順閒貳尹聶君瑄修之宏治辛酉邑令
張嵐漪因其舊加潤色焉庭院之廣狹殿閣之高
深與夫鳩工庀材之經營圖度問諸父老僅能道
其彷彿蓋均不可得而考已至嘉靖九年耆民蔣
儒因廟貌傾頽神像暴露矢志倡修買王錫芳地

增而廓之二十年社首買資張潤復與道士趙惟泰勦建七十二司規模掬備順治乙未元夜宮殿盡燬於火住持李演敬走募四方閱五年重構大殿寢宮兩廊未及修復演敬羽化去其徒劉全中竣其事自是以來又幾二百年矣丹垣剝蝕碧瓦飄零余於嘉慶戊寅冬莅任山陽倏有奉調馬工之役庚辰冬告養遽歸未遑修舉茲以道光十年庚寅秋重來斯土乃謀諸少府陳紹祖邑紳耆人等捐廉百金以爲首倡移寢宮地丈許改建明樓五楹重修大殿拜殿鐘鼓二樓竝新砌東西兩院甃牆四十餘丈道士陳德平慨然重修呂祖廟三

修武縣志

卷六

祠祀志

十七

楹門樓一座是役也自十一年正月興工十二年五月竣事是爲序

旗纛廟 端午霜降日兩祭

此廟久廢今於縣衙關帝廟中致祭

旗纛祭文

霜降用

惟神旗纛是司三軍所視威揚閩外疆圉是恃霜降旣肅仰答膚功神其有靈歆此菲供尙饗

龍神廟 在縣治東竝祀黑龍神白龍神至元二十九年建丁亥鄉民崔某修二月十四日八月十六日兩祭 又有白龍祠黑龍祠在溫盤峪

龍神祭文

惟神德洋寰海澤潤蒼生允襄水土之平經流順軌廣濟泉源之用膏雨及時績奏安瀾占大川之利涉功資育物欣庶類之蕃昌仰藉神庥宜隆報享謹遵祀典式協良辰敬佈几筵肅陳牲醴尙饗元縣人馬曙龍祠禱雨記

縣北兩舍而近有山曰溫盤山半飛泉垂練百尺聲勢洶怒奪目駭心下匯爲潭深不可測世傳二龍宅之人有見之者或潔如白練或爛如黃金潭西南有祠故節使劉公所建碑刻大略記龍公姓白與黑龍爭是潭山麓爪跡至今宛然首末與張宣城焦土臺類焉時遇旱遠近官民祈雨者靈應

修武縣志

卷六

祠祀志

十八

之迹榜於屋壁殆徧大德丁未自秋徂冬三月不雨監邑公伯不花乃齋戒三日率僚屬詣祠旣禱仍餅潭水歸置壇行祠朝夕焚香致敬不懈越三日雨大作公以旨酒嘉穀答神之休謂僚屬曰祀典有之能禦大菑則祀能捍大患則祀有大功於民則祀是神也易歉爲豐變枯爲榮非禦菑濟旱有功於人乎卽具其事申府乞達朝廷顯加封號前虢略巡檢閻從謂鄉中士夫諸老曰公能揚神之休我獨不能紀公之美乎求余文勒諸石伯不花公蒙古人

明縣人進士周佑重修黑龍祠記

略云治北五十里而近有溫盤峪中有黑白二龍潭白者據山之陽懸崖飛注泓深叵測折而北可二里 兩山中劈潭水出焉洶涌疊磴滃淵幽杳爲 龍潭世傳二龍共鬪穿山直走爪跡著石今尚可尋龍時偃仰水上居人見而駭之因禱雨有靈應潭之左因山闢址斬棘架楹肖像其中禱者就而拜焉萬歷丁亥修武大旱百里盡赤時郡丞劉公署邑事詣潭虔禱爲民請命越日甘霖大注士民歡呼旱不爲災公集父老諭之曰龍德我哉微龍無歲微歲無民我不能一日安於此也其修祠報之鄉民崔某跽而前曰某魏邨里民也距

修武縣志

卷六

祠祀志

十九

潭十里而近某請修之且是祠亦某先世之所營也公可之于是運斤型土走繩削墨撤其腐圯廣其湫隘越月而祠成余爲勒石記之

火神廟 在東門外六月二十三日祭

濟瀆神祠 在縣治西南隅祠前有池方廣數丈元文宗天祿三年縣尹謝公禱雨於祠邑人常玉連義等乃以甄甃之

元濟源縣醫學教諭李思誠濟瀆靈池記

略云修武縣地秀民淳有仁義之風焉坊曰清源舊建濟瀆行宮歲時致祭禮無廢焉瞻者畏敬之逮大元天祿己巳自春迄秋大旱百穀盡枯槁縣

尹謝公率諸僚屬禱雨於斯隸長常玉至於池顧其水已枯涸泥洿穢積有褻神明遂感於心同耆老連義之於是丐金鳩工淘洗至泉既清且潔以甃甃周圍歲寒之時以覽者無顛墜之患臨者無戰兢之懼基址損壞補之一新不日成功能繼昔人之績正臣許公來謁曰池已完矣潔矣若不刻諸貞珉以紀其芳何以示于後辭不獲已齋沐爲之荒蕪以記大元天厯三年五月日常玉胡興等立

明翰林岳正修修武縣濟瀆行祠禱雨感應記

郭侯以鄉進士令修武廉庶務之利病而整齊之

修武縣志

卷六

祠祀志

二十

民方知向而歲適亢旱砂煎石爍種不土入邑人於是相與謀曰遷市舞雩暴巫覘觴土龍祈而禳焉古法也請於侯而行之侯曰是法在令令之政急則德涸德涸則陽塞而不雨我固有以禱之也濟水出王屋去邑纔百里其神靈聞天下修武南門內建行祠以祀之其前有池濟水所出也侯詣焉淘池濬源而以其政令之所缺者自咎於神情切辭苦其與出野暴露積薪自焚者無異也是日果雨數日又雨三農告足庶情歡忭遂命工甃以甃周遭石爲闌干先是池水黑如墨不產蟲魚人皆異之不敢褻忽清澈瑩然如鑑無翳其中隱隱

有樓臺殿閣人物往來之狀如是者數日邑人驚駭聚而觀之莫知所以未三載而侯至所建城池樓閣市橋門巷煥然聿新與向日池中所現者不爽人以爲斯城斯樓信非偶然而今日感應之速夫豈無自是秋大稔禾有同畝異穎者有一莖兩穗者三穗四穗者父老曰此吾侯之德也請以聞於朝侯旣格而不許於是謀以是壽之於貞珉侯名應誠字誠之蜀富順人天順元年歲次丁酉夏六月

丹河神祠 在東關外小丹河東岸每歲九月十七日祭

修武縣志

卷六

祠祀志

二十一

八蜡神祠 在東關每歲十二月初一日祭

劉猛將軍祠 在八蜡祠東與八蜡神同日祭

八蜡神祭文

於惟尊神實司歲功驅螿斂騰五穀乃豐茲當歲禴虔具犧牲神其保佑惠此生靈尙饗

劉猛將軍祭文

惟神上贊帝德下惠生民時和年豐蝻蝻不興茲值歲暮式薦明馨神其昭格庶幾鑒歆尙饗

案翟灝通俗編引王沆識小錄劉猛將軍相傳名銳卽宋將軍錡弟歿而爲神驅蝗江淮間有功

奎星樓 在縣治東南城上明崇禎十五年知縣劉

光斗勦建有碑記道光四年知縣鄒光曾重修
邑副榜貢生王寶玉勦建奎樓記

畧云劉侯於崇禎壬午秋來宰甯聚諸生而課之
見甯之登科第者甚鮮侯怪之僉曰國初黷宮在
縣署乾方洪永成化閒科不乏人有多至七八名
者後徙坤方八十年不一上賢書焉萬歷辛卯督
學周公夢陽過之嫌其湫隘撤民居以通於衢且
廣其泮池是歲周氏佑雋鄉闈卒成進士丙午王
氏玉鉉發解天啟甲子郡守王公燦善堪輿術仍
尋乾方故址而徙之丁卯張氏三就獲雋成進士
數十年來今復寥寥豈地氣未復邪侯聞之外眺

修武縣志

卷六

祠祀志

二十二

河山之勢內察城郭之形乃曰黷宮居西北地峻
而城之東南稍卑建奎樓於巽隅或可以返當年
之盛乎僉曰唯唯侯出俸金以倡而博士弟子員
胥佐之始事於壬午之十一月告成於十二月
衙神廟 在縣大門內相沿每歲六月二十三日祭
馬神廟 在署東武安驛內 一在南門內勝果寺
西相沿每歲六月二十三日祭
句芒神 每歲立春日祭 以上秩祀
神農廟 在縣東京裏邨有五穀臺
湯王廟 在西關道光十一年知縣趙銘彝重修二
月八月與社稷壇同日祭

漢獻帝廟 在縣北古漢山廟中有漢獻帝畫像昔歲於九月初九日縣官詣古漢山致祭今於東關外禪陵碑前遙祭

東嶽廟 在南門外

知縣冷宗元碑記詳金石

西嶽廟 在縣西待王鎮

玉帝廟 在城東北小丹河西岸

元帝廟 在北關外 一在太行山茱萸峯頂

天 廟 在縣西北孔莊

孔子問禮廟 在孔莊

河內縣進士成文重修孔子問禮廟記

略云吾嘗驅車適修武得古蹟二一日待武王處

修武縣志

卷六

祠祀志

二十三

一曰孔子問禮處書稱武王伐紂渡孟津至朝歌則懷衛之間皆昔所行師處民之待於此也宜矣至孔子適周問禮於老聃老聃者周柱下史也烏得而居此哉且晉文公平子帶之難王賜之地遂啟南陽則茲地已爲晉有距孔子適周時已百餘年孔子何緣而見聃於斯邪乃修武之人旣爲之樹碑於道而又有廟以祀焉或者傳聞之誤而未之深究歟然吾於此見懿德之常存而人心之不泯也夫仁聖賢人相去不知幾千百年矣而其少而嬉戲也則卽其嬉戲而誌之長而遊處也則卽其遊處而誌之卒而墟墓也則并其墟墓而誌之

不惟存其真而且存其似不惟傳其信而目傳其疑故舜卒於鳴條而蒼梧有墟禹葬於會稽而石紐有鄉若是者豈聖人之生平出處果在於斯哉蓋慕善樂道之思根於人之性情極於人之寤寐而偶得其似者遂據以爲真而傳之亦未有起而議之者也其疑其信誠有所不必辨也且吾於此尤有感焉當武王渡河之初虎賁三千諸侯八百其喧赫震耀爲何如者若我夫子生平固未嘗至此而一車兩馬棲棲道路以視鷹揚熊羆之眾奚啻萬里而一則存之以爲伐暴救民之功一則存之以爲稽故攷文之實修武之人未嘗有輕重焉

修武縣志

卷六

祠祀志

二十四

是知聖人之不朽於天地者自有所在而不係乎遇不遇之間也歲秋月鄉人將易其廟而新之有問於余者遂以斯爲之記

三官廟 在東關 一在縣治西城基

薛將軍祠 在縣南二十里王邨東祀唐左驍衛大

將軍平陽郡公薛仁貴

詳古蹟

呂帝廟 在城隍廟內西偏道光十二年道士陳德平建每歲二月初四日祭

韓文公祠 在縣東甯城書院內與文昌同日祭

一在治北南陽城

知縣楊廉韓文公祭田記

竊惟

先儒文公韓子文起八代之衰道濟五世之溺誠以匹夫而爲百世師者攷之志迺修武人也自李唐以來海內人士皆仰之如泰山北斗况其桑梓之可祭鄉先生於社者乎是故甯城書院設文公神位爲斯文宗主俾肄業人士如坐於當年函丈閒而祀產闕如無以供俎豆則崇先哲以勵後學之義安在哉余用是購地八十畝零九分九釐七豪爲公祠祭田卽給其後裔生員韓掄元領種輸賦之外歲取餘資以備酒醴粢盛春秋致祭焉韓生務率其子孫世世力耕奉祀楚茨之詩云苾芬

修武縣志

卷六

祠祀志

又二十四

孝祀神嗜飲食卜爾百福如幾如式可不敬歟余恐日久弊生爰立石誌其事并誌其地以備攷云
嘉慶二十年仲春月

祭田坐落

- 一在縣東北二十五里禮賢莊三十段計地五十
- 四畝六分五釐三豪外莊基三畝零
- 一在縣正南二十里南柳四段計地一十四畝九分四釐七豪
- 一在縣正南二十里西常邨二段計地一十一畝三分九釐七豪

韓湘祠 在南陽城

明陳

韓湘子神仙辨

世傳韓文公孫湘神仙人也嘗諷公沖舉公不從一日因宴集忽席上開牡丹二朶詩其上云雲橫秦嶺家何在雪擁藍關馬不前公未知其解後公以言佛骨事貶潮州途中遇湘冒雪來曰憶花上之句乎公詢其地名卽藍關也遂卽成其詩云云予案唐世系表湘字北渚公姪老成子公兄介孫長慶三年進士又案公集有詩題云左遷至藍關示姪孫湘一首他日有宿曾江口示姪孫二首而賈島集寄韓湘詩又有過嶺竹多少潮州瘴滿川之句則公之赴潮湘實從行非邂逅不期之遇也

修武縣志

卷六

祠祀志

二十五

而湘第進士去是年纔四年耳後官至大理丞湘固公輩人何得有神仙事也酉陽雜俎載韓侍郎有疏從子姪自江淮來年甚少韓令學院中伴子弟子弟悉爲凌辱韓知之遂爲街西假僧院令讀書經句寺三綱復訴其狂率韓遽令歸且責曰市肆賤類營衣食尚有一事長處汝所爲如此竟作何物姪拜謝徐曰某有一藝恨叔不知因指階前牡丹曰叔要此花青紫黃赤惟命韓大奇之遂給所須試之乃用箔曲尺遮牡丹叢不令人窺掘窠四面深及其根寬容一坐惟齎紫鑛輕粉朱紅旦暮治其根凡七日乃填阬白其叔曰恨校遲一月

時冬初也牡丹本紫及花發色白紅歷錄每朵有一聯詩字色分明乃是韓出關時詩一韻曰雲橫秦嶺家何在雪擁藍關馬不前十四字韓人驚異姪且辭歸江淮竟不願仕據此則公自有疏從姪挾術自售乃遠從江淮來又竟歸江淮不復仕非湘甚明而花上之句卽姪於公還朝之後述其初赴潮之詩亦非公姪之逆自爲也今公遺集有贈族姪詩擊門者誰子問言乃吾宗自云有奇術深妙知天工疑謂此人事記段成式與公同時不誣而近日唐荆川史纂左編全不考證妄列湘道門且謂湘送公藍關一宿卽辭去公畱之不可得作

修武縣志

卷六

祠祀志

二十六

別湘詩云舉世皆爲名利醉伊予獨向道中醒他時定是飛昇去衝破秋空一點青旣雅非公本趣兼詞句凡猥退之家奴不爲至謂湘出藥一瓢戒公日服一粒以禦瘴煙公謝湘有慮不脫死魂遊海外一思至此不覺垂淚之語何公一旦衰颯狂惑遂至此乎宜不然矣編又謂湘公猶子竝其家世皆失之

楊公祠 舊志在百家巖祀明邑侯楊公楠

碑見
秩官

河北道僉事劉公生祠 在南門外

明邑舉人王玉鉉河北道僉事劉公生祠碑記

公之監河北也在嘉靖之四十年今爲萬歷之己

亥蓋三十有八年矣而郡司馬鄭公始署懷篆景
仰往昔賢哲之事而吾鄉父老沐公之政謳吟而
思慕之因相與謀曰明興二百年而吾郡若邑之
民得分巡劉公始爲一更生云洪武初爲守鐵木
兒抗王師統一之後定吾郡歲賦四十萬故計八
郡則吾郡重而計吾郡之六邑則吾邑又重近一
百年吾邑令苦吾邑而力不能均之郡吾郡守苦
吾郡而力不能均之河南諸劻郡吾郡若邑之民
有坐罷而已至嘉靖四十年公始爲一均且蠲之
而向之所定四十萬者四分之而計減其一京邊
糧以周甫告改去一千石有奇兌軍米以曹琴告

修武縣志

卷六

祠祀志

二十七

改去一千三百石有奇均分濟源六縣荒糧除去
五萬八千八百兩有奇歷日紙張棉襖等銀改去
一千六百兩有奇派汝南二郡料價改去六百兩
有奇民兵銀改去一千二百兩舉場棘鍼銀改去
四百兩派儀封等縣修理廨宇銀省去一百兩有
奇銀差改去舊志均分濟源六縣河夫裁去二百
名青夫裁去一百名力差裁去一百四十三名存
畱修隄護守親藩夫裁去二百名覃懷驢頭改去
四十一名撥襄城等縣其他賑匱乏興學校戢盜
賊禱雨雨應禱雪雪應諸所造福於郡若邑者不
可勝紀而均且蠲至鉅萬所爲郡若邑之福更遠

而大故當時逋亾之民瞻烏爰止者公徠之及今三十餘年民且享太平之世嬉遊而歌誦者公字之而休養生息以至萬世則又公貽之也公且老不獲奉公邑且無所致報公庶幾徼朝廷褒功報德之典當吾世而入名宦祠致吾懷萬分之一乎哉於是某等及鄉民請官祀公而申鄭公鄭公申部視學使者徐公照例顧弗得也則復請申祀公曰此將爲公甘棠也而祀之亦弗得乎哉鄭公以報今分守朱公好恤民亦如公之爲人故令吾郡若邑之民得遂所私焉擇地於南門之外爲生祠王子曰吾讀甘棠詩見民不怠召公聽訟處而所

修武縣志

卷六

祠祀志

二十八

謂爲善之政不概見及讀召誥之篇稱無疆惟恤而周公之稱君奭亦曰今女永念知其所圖於民者大也假令公修一令斷一獄則小補之而已其與幾何惟均且蠲鉅萬卽三十年爲三十鉅萬卽累百年爲累百鉅萬豈不無疆而永也哉茲甘棠所以再賦也抑書曰無偏無黨王道蕩蕩公駐吾郡若邑而賦均且蠲將無偏黨乎哉而吾郡若邑之祀公抑無偏黨公平哉哀多益寡豈非以其舊志缺邪故無私余過安陽橋橋畔有公祀將無安陽之民亦私公平哉吾郡若邑之思知吾境已耳觀安陽祀則人以公爲私人以爲私則無私矣雖然

吾郡賦今三十萬計今他郡尙不滿三之一吾郡地畝以二百四十步計他郡以三百六十步計歲賦則又減三之一監茲地者又能無感於公也邪

劉公祠 在縣治東街龍神廟內西偏祀乾隆初年知縣劉建吉每歲于二月八月二十日祭

修武縣知縣馮繼照重修劉公祠記

道光十有三年余奉檄視修武事祇謁境內神祇見龍神廟西偏祠宇丹堊煥然詢之吏吏曰此邑正東路祀故修武令劉侯者也侯諱建吉字慎修貴州南籠人充康熙乙卯科選拔貢生乾隆二年莅任修武侯之未來也正東路以地不產穀草請

修武縣志

卷六

祠祀志

二十九

前任陳侯豁免武安驛芻茭陳侯旋去任侯來邑人復欲派正東路侯援前案豁除事乃定以故正東路感侯之德積久不能忘乃權奉公粟主于別室中又公同商議釀錢買地建祠以祀之而費用不貲道光七年鄒侯至龍神廟祈雨詢知其事倡捐廉俸而邵侯趙侯繼之祠遂成從民欲也余歸而詢諸耆老檢諸邑乘得君建牖立橋墾荒灌田諸善政而開濬消河厥功尤鉅修武治太行山釐雨後輒水勢坌涌向有小丹河新河蔣河消納邑中諸水獨西南境上承武陟甯郭李邨河內七孔橋楊義廟諸水山水漲發彌望汪洋君從西南寨

裏邨至東北平政橋疏鑿四十五里以達新河於是積潦無患水經注漳河神壇碑載漢修武張景明爲鉅鹿太守漳津汎濫土不稼穡景明原其逆順揆其表裏修防排通以正水路功績有成民用嘉賴君開濬消河使修武無汎濫憂其功豈有異歟宜乎邑人謳思不置而非正東路之民所得私也祠旣成邑紳以文請因書以示之俾勒諸石祠內室宇及捐修姓氏悉載碑陰

以上正祀

寺觀附

勝果寺

在縣治南門內宋紹聖中建丹川李退叟作記甃塔九層殿宇寮舍共七十二間蓋巋然名

修武縣志

卷六

祠祀志

三十

刹也明洪武初修景泰十七年重修塔本在寺中因牆垣頽敗不知何時隔在寺外然猶屹立如故

勝果寺碑鍾樓記俱見金石

興勝庵

在東後街

清泚觀

在東門內城東北隅水塘中央

崇明寺

在縣北二十里五里源邨西元禮部郎中

張公琬明何文定公瑋有記皆云稠禪師所建中有唐代石幢及宋魯千之詩碣凡游百家巖者皆至寺小憩焉寺頗具花木竹柏之勝惜牆垣頽敗

寺僧寥落無存矣

石幢及詩碣見金石明邑人王寶王讀書崇明寺梵宮綠

蔭圍境靜客來稀怪石侵枯樹春禽噪夕暉開窗邀翠入捲幔放雲飛到寺纒三日翛然與世違

清真觀 在縣北二十里馬坊邨邱長春入道歌見金石

金元好問馬坊冷大師清真道院詩枯蒲折葦清灣十里風荷指顧閒安得西湖展江手亂鋪雲

錦浸青山又坊冷大師清真道院二首水際

茅齋星散居白雲間伴五溪魚茂林修竹山如畫

石佛寺 在縣北四十五里赤莊西二里許

百家巖寺 在縣東北五十里天門山腰太行山名

刹數十惟茲寺負巖而居有翕張闔闢之勢入山口但見浮圖矗立而已又前二里許始見琳宮梵宇歷落山半歷石磴數盤方入寺門明月泉瀉於修篁亂石閒案寺勅自高齊稠禪師寺西石壁上龕室猶存至唐寺僧處忠及其徒曇最重修杜鴻

修武縣志

卷六

祠祀志

三十一

漸為之記額云重修百家巖寺碑咸通中孟州人立碑亦云百家巖寺則寺固以巖名也至宋元祐二年崇明寺僧守千呈請官給地土山林四至公據遂以五里源崇明寺之名加於百家巖寺其後元至正十年禮部郎中張公琬作五里源崇明寺碑篆額云百巖崇明寺碑大護國仁王寺下院而五里源之崇明與百巖遂合為一惟前明何文定公塘重修崇明寺記云齊稠禪師當時建大護國仁王寺以處之五里源崇明及百巖寺則皆院也蓋余嘗攷之百巖寺有二一在天門山腰張何二公碑記中所謂大護國仁王寺者也在

牆北邨則天門山之下院其寺不在百巖而加以百巖之名者也其後仁王寺廢而僧眾皆居於五里源之崇明寺遂以崇明彊加於仁王寺而究之至今土人所稱仍名百巖寺是寺與巖相得益彰誠非俗僧之所能擅易者矣

百家巖詳見古蹟

唐杜鴻漸重修百家巖寺碑

百家寺宿蹟在太行山南我唐天子所主之邦盡中國中國山嶽以千數太行為靈長太行延袤且千里有巖焉肇自高齊爰立茲寺以其巖平易可容百室故命之曰百家也觀夫畫閣高懸寒玉亂瀉勢連重冥居凌太虛軼浮景以遠耀帶流霞而

修武縣志

卷六

祠祀志

三十二

飛動信梵旅之寧處又何必花爲宮而瓊爲池乎周人滅齊初隆中廢隋氏踐位厥名乃復然而乾綱不周生人畢墜於水火佛日未明像法與時而銷滅物不可以終否故天命旣集於皇家惟聖祖建元嗣及我后赫赫在上以整亂略天平海清庶物遂成敖遊其中則莫之夭闕已雖陋夷叢處同慕緇錫虐虜獸心追崇塔廟詩所謂自西自東南自北無思不服矣况於邇者乎前此者禪師處忠身具律儀言爲訓誨萬眾蒙益千里向風故能磨嶄岳翦翳薈搖木斯拔巨石必轉儲供外辦功費不貲歷數十年以授於門人曩最最公則公之

尚德也敬求畱事懋跡先賢行細一塵誓深溟壑
由是特啟宏宇易置高廊坼土樹芳貫石行水動
有方略隨其便安終今以來假有尺塗片瓦之力
蓋無足云爾記有之凝冬不洩永日清暑盈虛應
期漱浣流惡廚北靈泉利用之極也傾崖前表飛
澗遠激皦如晴蜺噴若風雷寺西瀑布威儀之觀
也雙峯插雲對壁爭峻仰攀霄漢下冥煙雨巖上
天門通元之階也一徑橫互紆餘乍滅靜出猿鳴
視臨河嵩隱見睂睫極遠之路也若夫奇檀修竹
嵇竈孫臺鄧封遺堆玉仙餘水昔人之休寄此地
者豈不宜哉上座如航寺主英俊都維那善等蓋

修武縣志

卷六

祠祀志

三十三

嘗聚徒而言曰處寂默者而以了心資言說者亦
以入義非山林境勝何以臻此內通非文字旨遠
何以宣乎外法會議刻石來徵予詞夫賢明之長
有博陵崔珪焉其貳佐也敦信之士有崔伯崑韋
無擇崔皋焉能成之俊有趙璘焉協無異謀其敢
牢讓銘之曰巖巖太行縱橫千里環厚地兮寂寂
梵宮懸處百仞乘顛氣兮豪光月滿照清三界破
昏類兮石爲可久文亦播揚行拂事兮天寶八載
二月晦建全唐文
明馬瀾百巖寺重修佛殿記
百家巖寺在太行半山中層巒疊嶂或峙於後或

拱於菊或伏於前水出石中清流遶屋可以濯纓
可以洗耳晉魏唐宋以來遊人騷客代有遺蹟避
暑有樓醒酒有臺淬劍有池紀載題詠有詩有文
蓋一邑之勝地也友人范抑之與余嘗一登覽焉
巖前佛殿煥然一新規模宏麗於舊有光其寺僧
有曰滿舟者再拜於前曰願有以紀其歲月予問
其主事者爲誰滿舟曰殿之在東者吾師幸俊建
於昔者也殿之在西者吾師幸俊建於今者也問
其工費之出則曰材木取之於山瓦甃陶之於冶
力役雇之於人以錢計者幾千緡以粟計者百餘
石耳問其錢穀之出入則曰施之於鄉人者三之

修武縣志

卷六

祠祀志

三十四

二取之於山田者三之一斂之於衣鉢者亦足以
助其不及焉皆吾師之所綜理也問其修造之本
末則曰經始於正德庚午落成於嘉靖丁亥功未
畢而吾師沒繼成師志者滿舟亦與有力焉嗚呼
天下之事不患乎功之不成而患乎信之不篤幸
俊之爲師滿舟之爲弟子皆能篤信其所學而崇
奉之以持永久可謂能振彼宗風而有功於其教
者矣予學孔子者也其所以傳之信之者視彼反
不能無愧焉乃樂於山水之勝而有以識吾之遊
也故直書其所言以爲記

蕭家芝重修百家巖寺暨募施齋田記

天門山峻嶒尊處割其半爲巖度地得百家故曰
百家巖余亾友范龍圖與其伯兄晴麓往往爲余
道百巖幽勝今年秋八月始與竇子雲明家弟樹
百選勝蘇門過白雲寺絕清水案此益信峪
河爲清水土人
指山半浮屠卽百家巖精舍入山二里許浮屠瓴
甌可數然見浮屠尙不見寺也又里許亂流湑
疑環珮鍾鼓之音與風雨雜至復磬折行茂林下
數盤而上則寺門也歷階而東禮大雄殿殿後竹
數十竿秋高夜永微風蕭颯而已次東又爲佛殿
六楹殿後則明月泉水瀉而南穿叢篁委折而下
由池左攀藤而上稍東有石如几案布席可坐數

修武縣志

卷六

祠祀志

三十五

十人曰鳳凰臺臺東數武石壁成罅水自罅中漉
洌寺衲曰王烈泉也水濺亂石中躡履溯洄則伽
藍殿側夕陽曜景金碧璀璨蓋新構也寺衲具食
食竟西導去大雄殿數十武數椽修潔一羽士跌
坐其閒寺衲謂范晴麓所小築云羽士舊識樹百
攜與俱西有石長二丈如箕舌俯窺絕壑大鐫其
石曰劉靈醒酒臺宋元祐閒手筆也臺右爲嵇康
淬劒池西爲稠禪師庵庵在石壁閒又西則壁上
潺湲之迹與對面浮屠正相衝擊者寺衲以爲經
雨則瀑布乘空望如匹練曠乾未易覩也低徊移
時山空月白涼秋不寐羽士乃謂余曰子大夫見

漢獻帝陵乎銅駝石馬鞠爲茂草此寺亦幾爲敗
垣矣上人以順治十有三年卓錫太行募建伽藍
殿四楹蓋重繭茹荼九年于茲而後佛堂廚舍以
次鳩工工旣竣羣謀買田數十畝資上人朝夕則
又曰得勿以長吏誅求累上人乎田遺上人籍則
檀越合計戶口共得田若干畝是役也十方金布
而領袖則范姜二長者將勒珉以誌不朽子大夫
加之意焉余惟河朔名刹東有白雲西有月山而
躡名賢之履蹟續殘碣于晉元則百巖寺實名刹
也余豈敢以不文辭哉寺衲名性智楚之德安人
人稱慧元禪師范名正宗卽晴麓姜名豸龍號御

修武縣志

卷六

祠祀志

三十六

六俱修武人

邑人御史趙旭百家巖公捐贍田記

太行之陽有峭壁屢屨背天門面嵇山環亂峯而
半翠微者曰百家巖以其嶮巖欽寄故曰巖或曰
是巖也可以容百家故謂之百家巖云晉劉伶嵇
康輩倘徉於此史稱劉嗜飲嵇好鍛今醒酒臺淬
劒池古跡猶存他如明月泉王烈泉嘯臺瀑布諸
名勝邑誌之余不贅巖之中上倚立壁有梵宇東
西對峙一統志謂天門山上有精舍卽此寺建於
高齊神僧稠禪師師沿山扞建二十餘所此其一
也酈道元曰南峯北嶺多結禪棲之士今觀其厓

洞紆曲水石幽奧殆信然已建寺以來歷唐宋元明時有補修然皆無加於其初地限之也寺舊有贍田兵荒後環山之地鞠爲茂草何有於贍田順治十三年有孝感僧性智杖錫來遊手闢荆榛康熙元年邑之雅慕山水者相與結伴登臨流連信宿香廚之積無三日糧恐養贍無資釋子不可以久畱於是眾捐地一百五十畝各案里籍隨具領承糧不以賦稅累僧人又眾捐地二百六十畝合前共地四百餘畝永爲贍田糧在里甲而地實本寺原舊之贍田也性智手足胼胝不遑寧處始成熟地卽謀勒石以紀厥事會性智遠遊未果其徒

修武縣志

卷六

祠祀志

三十七

海香恐年久歲湮贍田不可復識也爰議刊石以垂永久定其畝數正其基址用杜彊梁者之侵占且以資養靜者之朝夕焉

案此文載舊志其碑有二一在寺內又一在巖前山神廟旁前令李景和大書嵇山二字鐫其上

觀音寺

在縣北十八里蔣邨

明碑見金石

梳風寺

在縣北二十五里隴城寨舊名吳澤鎮邨

南寺中有元張陸邨重修功德碑記云卽古隴城

采訪碑
詳金石

崇興寺

在縣北三十五里方莊

眞慶宮

在縣北五十里衚衕窰北康熙年建中有

古松邑令胡睿榕有古松記刻石樹下

府志
古蹟
見古

邑人范琥勅建眞慶宮記

眞慶宮者雲臺頂之下院也雲臺頂本雲臺山昔人立廟於頂以祀眞武廟之勅始歲月不可攷明末饑饉頻仍鋒鏑肆起環山邨落悉成盜藪徑路閉塞者十餘年有羽士來自薊北遙望一峯插天孤峭秀矗狀猶華蓋輒畱連不忍去翌日裹糧伐道凌絕頂俯視疊嶂環拱茲山聳拔居尊較之天壇武當殆無多讓乃喟然歎曰有如此勝槩而顧使棟折垣頽鍾殘碣敗其如吾徒何因跪告於帝座前曰弟子某願以修葺爲己責獨是茲頂遠在

修武縣志

卷六

祠祀志

三十八

萬山中距縣治八十里距平陸五十里上乏田廬下多谿澗石磴倒垂崎嶇陡峻值正二月香火旣開男婦繽紛車馬絡繹計其程必前一日入山至次日則置車馬於山麓攀藤緣壁魚貫而升道旣險復迂由寅達午方造其巔復由午達申方還其麓麓無室廬羣露宿於榛莽荆棘閒時而風吼猿嘯時而鬼泣虎嘯種種驚怖眩目搖心擊鼓鳴金坐以待旦於是羽士思建下院以爲往返接濟之所而難其地先是余曾祖橘亭公於頂之南有莊名曰黑石嶺經敵荒蕪羽士因乞諸先君先君曰茲業也舊勑於吾祖而今則四分析之矣吾祖素

稱善士吾儕何敢以其所遺視爲己有而靳之隨同先叔丁亥進士諱正脈先堂叔增廣生諱正心庠生諱正己咸樂施捨無異詞不二載而大殿兩廡俱告成羽士復請先君譔次勒石乃不期稟未脫而先君竟臥疾不起矣羽士追念疇昔復爲書以告余余因操筆布紙備敘始末庶使先君之義不致湮沒而弗傳而羽士之功亦當歷久而彌彰也羽士梁姓名陽龍直隸保定人

國朝知縣胡睿榕眞慶宮山神靈應記

縣北境接太行邨人散處山麓歲辛亥余莅任屢聞有虎患特從役往跡之不見見坡有廟焉神像

修武縣志

卷六

祠祀志

三十九

猙獰甚土人曰此山神廟也余因宿而禱焉後遂不聞有虎壬子春忽有走告者曰晉人某過此爲虎啖矣越一旬復有來告者曰邨人某某爲虎負去矣告者凡三四輩余勃然曰吾民朝廷之赤子也虎何得恣食之若是急往山神廟瓣香告神曰某奉天子命來爲吏以父母斯民除民害職也今爾神縱虎殘害吾民其何以血食一方請與神約必盡殺之不能則驅使遠去俾避天子之命吏否則將率吾民焚神廟毀神像神其無悔禱畢令獵者晝夜伺之無所得旬餘有得死虎於山之澗者復索之連獲虎豹二邨人哄然曰神殛之也夫走

報余且獻其皮骨由是患遂絕余聞漢九江太守
宋均有惠政郡中虎多渡江去余不德惟邀惠於
山神以誅殛之愧滋多矣余又聞苛政猛於虎庶
幾愛養吾民撫摩而噢咻之以無忝告神之言云
雍正十一年歲次癸丑仲春月

雲臺寺 在縣北八十里茱萸峯上卽雲臺山之西
北峯寺祀真武

萬善寺 在縣北五十五里真慶宮北俗名溝坡寺
明萬歷年間建有泉出東北山麓寺僧鑿石爲槽
引入寺側匯小石池內若一綫然

府志明望親
臺記見金石

善車寺 在冷泉背邨西後倚方山昔爲勝境今廢

修武縣志

卷六

祠祀志

四十

彌陀寺 在縣北二十里高寨邨

保安寺 在縣北二十二里陸真山

梁開平石
幢見金石

六真祠 在縣北陸真山後唐天成閒建後爲元真
人邱劉譚王郝馬講道之所明洪武閒改修

案水經注已有陸真阜六當作陸邑人相傳山以
邱劉譚王郝馬得名者誤也又金李俊民有騫林

觀詩疑卽此

詳見山水
及古蹟

蓮池寺 在縣西北土門掌邨北山上

普照寺 在縣西北五十五里田澗

龍興寺 在縣西北五十里圪料阪北鳳凰山上

雙仙閣 在西門外知縣張明遠建

吳志

興國寺 在縣西北十八里西孔莊元碑見

百巖寺 在縣西北四十里牆北邨亦百家巖寺之

下院

法明寺 在縣西山陽城內寺東北半里古有藏梅

寺寺廢金移建於此有大定三年勅賜法明禪院

牒碣明宣德七年重修今因殿內存有千佛碑又

俗名千佛寺金勅牒見金石

觀音寺 在縣西二十五里蘇蘭

圓融寺 在縣西北五十里呂澗山唐太和三年建

明永樂七年周王橚琢玉佛施於寺今存明碑詳金石

案金李俊民贈陳仲和并序吾友仲和故遼降虎太

修武縣志

卷六

祠祀志

四十一

師之後以蔭補官累階三品喪亂之際相會於山陽年六十有二神閒而意適手持數珠日誦佛書不輟真髮僧也因誦飽諳世事慵開口會盡人情

只點頭之句以此意索詩因書以示之百年浮過落花風漆

水榮華一夢空拈起數珠都念卻大千世界入圓融詩雖不言何寺然以大

千世界入圓融句味之殆寄跡此庵歟

二仙廟 在縣西北四十五里棲鳳山上吳志

元教諭趙宜中棲鳳山二仙廟祈雨感應記

二仙神祠在在有之原其所自肇於上黨壺關遇

旱祈禱無不獲應故有冲惠冲淑真人之號縣舊

有廟在西北山巔扞建於金大定初重修於興定

末越歲滋久浸將傾圮大德三年乙亥冬鄉人李守信等願爲葺理於是捐資協力鳩工市材不踰載而功告畢煥然一新矣至大二年夏旱居民范寶李德輩祈禱祠下不旋踵而雲興雨霈闔境霑足里民乃潔壇場備肴酒奏樂而享祀焉旣而秦成等欲紀神異勒諸貞石介門人李謙來請予告之曰神人感通不誣苟能絜其心以盡吾誠敬雖天地之大猶能動之况神依人而行者乎祭法曰能禦大災則祀之冲惠冲淑二眞之能禦災也其享世祀宜哉故從其請而書之復繫以詩俾里人歌以奉祀庶幾久而不忘也歌曰神之來兮僊人

修武縣志

卷六

祠祀志

四十二

鄉身著赤霞雲錦裳手持天瓢濟旱殃下與民庶降福祥祈禱感應雨沱滂飄風飛電威怒揚粲盛黍稷非馨香享於克誠無有常歲時伏臘薦豆觴奠桂酒兮椒荔漿神之去兮鏘珮璫駕玉輦兮雙鳳凰雲杳杳兮雨茫茫萬民感德兮不可忘

普恩寺

在縣西承恩鎮

明碑見金石

寂照寺

在縣西四十里榆邨

聖佛寺

在縣西北五十里流沙坡明嘉靖隆慶間

僧續永僧宗潮相繼修葺

二仙廟

在縣西四十五里王褚

元碑見金石

居德寺

在縣西北五十里嘉禾屯

唐碑見金石

圓覺寺 在縣西四十五里新店

普明寺 在縣西二十二里西待王

靈泉寺 在縣西五十里苟泉陂西數武相傳為西

晉時建 府志 龍泉池記 見金石又詳山川

三無私廟 在縣西南十八里孔邨元至正四年建

吳志

普濟寺 在縣西南二十里高邨

圓通寺 在縣西南三十五里新安鎮

清涼寺 在縣西南三十里南謝

玉皇廟 在縣西南十三里定交屯

西明寺 在縣南十二里周劉邨 有唐造像記及金題名見金石

修武縣志

卷六

祠祀志

四十三

興龍寺 在縣南十八里南柳

隆興寺 在縣南十八里彥門

觀音堂 在縣東南十八里宣陽驛

二郎廟 在縣北東版橋邨西半里 案二郎有李冰子二郎佐父治水有功元至順六年加封英烈昭

惠靈顯仁祐王見續文獻通考宋大將李顯忠子

二郎明正統中敕號波海見延安府志此廟疑為蜀守子二郎

案四鄉

神農廟山陽城牆北上馬邨俱有之

八蜡廟蔡坡有之

湯王廟東新莊有之

關帝廟辭陳邨京裏邨王里長屯孟邨平政橋待

王鎮牆南口承恩鎮榆邨五里源張田河俱有之
火神廟新店北睢邨馮營楊家樓新安鎮常莊店
后延陵俱有之

龍王廟苟泉陂小衛邨俱有之

濟瀆廟蔣邨有之

玉帝廟古漢山范邨南屯平陵承恩鎮榆邨蓮花
池大東邨喜鐵山釣臺營磨臺營俱有之

五嶽廟待王鎮有之

天齊廟

卽東嶽廟

東常衛郇封亮馬邨陳邨俱有之

元帝廟小文案東版橋承恩鎮習邨俱有之

三官廟夏莊南霍邨白龍澗李固安陽城俱有之

修武縣志

卷六

祠祀志

四十四

泰山廟五里源大陸邨趙屯俱有之

二仙廟董遐固蘇藺邨承恩鎮王褚白莊田門李
莊西邨俱有之

補遺

風伯祠 在隕城寨邨北

知縣馮繼照改建隕城寨風伯祠記

昔者孔子作易傳以巽爲風又曰風以散之蓋天地之氣慮其鬱而不舒風行則無所不達而無微不入所賴爲宇宙鼓太和者不在是歟觀師之祀肇于周官風俗通義又曰飛廉風伯也亦歷代祀之顧風之發也爲祥風爲和風於萬物固有生成之功爲暴風爲烈風於草木亦時有摧折搖落之患則欲以禱祀而禳祓之知必有道矣修武治北三十里曰隕城寨舊有廟宇名曰結義垓漢昭烈

修武縣志

卷六

祠祀志補遺

四十五

暨關壯繆張桓侯趙順平三人竊謂結義之說本屬不經君臣列坐偵矣昭烈帝蜀其聲靈未及於河朔桓桓隕城誣矣我朝以太牢祀關帝封號協天迺屈之配享悖矣余以山左迂儒竊媿不能揚仁風以慰黎庶而寤寐祈禱惟望天以五風協十兩歲得年穀順成使吾林林總總者無飢寒之憂爲大願也故敬遷舊像而崇風伯之祀以古所傳封姨孟婆葛元鄭公侍于兩序用昭護衛崔孝廉星聯督率彼地子衿共襄其事啟工於道光庚子十月十六日及十一月旣望而畢孝廉請余記之謹敘其緣起勒諸麗牲之石

馬神廟 在署東武安驛內

知縣馮繼照重建武安驛馬王廟記

修武古甯也邑隸於河朔北通燕趙西達雍涼蓋由古爲衝衢有驛曰武安定制官馬四十二匹余初蒞任馬旣缺額且多羸病不堪用此宰官之不以郵政爲急也迺戒圉人覈芻豆謹休養以肥瘠定驛卒功罪一歲之間芻縣無修武馬肥矣馬廄馬閑兵書驛卒之居廬皆以次繕完唯舊有馬明王廟一間未悉建置年代體制狹隘而歲久殘敗屢葺不免罅漏爰事改作拓長三丈六尺闊二丈二尺建祠三楹前爲卷棚以備行香展拜又前爲

修武縣志

卷六

祠祀志補遺

四十六

月臺以便視馬馳驟植二柏於臺上則將以取蔭也自道光庚子八月望日啟工彌月而事畢唯驛門偏於西者將及一弓且卑而狹不利車行越歲辛丑四月一竝撤毀移正而高廣之且退北丈有五尺門之兩旁各造廊舍以翼之於是驛前倍爲軒敞加之黝堊丹雘視昔爲壯觀矣周官祭馬祖祭先牧祭馬社祭馬步注馬祖天駟也先牧始養馬者馬社始乘馬者馬步神爲馬災患者近世則獨供馬明王之祠祀埽像三目而四臂蓋是星精或謂王爲西域人故祭牲用羊庸詎知非以大宛烏孫古產良馬因有此說乎哉

清真觀

金元好問清真觀記

修武清真觀在縣北馬坊全真諸人爲邱尊師之所建者大定初邱自東萊西入關隱於礮溪十數年不出天下以爲有道者興陵召赴闕取道山陽愛其風土之美裴回久之且謂其徒言在所道院武官爲之冠濱都次之聖水又次之若輩得居於此則與濱都聖水相甲乙矣諸人乃乞地於鄉豪馬子安家而得之積以歲月廬舍乃具舍旁近出大泉漑千畝稻塍蓮蕩東與蘇門接茂林修竹往往而在太行諸峯壁立千仞雲煙朝暮使人顧揖

修武縣志

卷六

祠祀志補遺

四十七

不暇考之地志蓋魏晉諸賢之所樂而忘反處也大安初以恩例賜今名貞祐丙子邱命劉志敏來居劉縣人邱高弟也故聚徒至百人興定庚辰之兵觀廢正大辛卯志敏之徒冷德明者復葺居之今所食又千指矣歲甲午予自大梁羈管聊城德明之法兄弟房志起自覃懷來介於幕府諸君請予爲記房外朴而內敏質直而尚義有似夫墨名而儒實者因爲次第之并著予所感焉嗚呼自神州陸沈之禍之後生聚已久而未復其半蚩蚩之與居泯泯之與徒爲之教者獨全真道而已嘗試言之聖人之憂天下後世深矣百姓不可以逸居

而無教故爲之立四民建三綱五常士農工賈各有業父慈子孝兄友弟敬君臣嚴夫婦順各有守九官而有司徒仁義禮智典章法度與爲士者共守之天下之人耕而食蠶而衣養生送死而無憾粲然而有文驩然而有恩於聖人之教也若飢者之必食寒者之必衣由身而家由家而達之天下四方由不可斯須離至百世千世萬世而不可變其是之謂教而道存焉於其閒傳有之天祐下民作之君作之師道之行與否皆歸之天今師徒之官與士之業廢者將三十年寒者不必衣而飢者不必食蓋理有不可曉者豈非天邪如經世書所

修武縣志

卷六

祠祀志補遺

四十八

言皇極之數王霸之隆至於爲兵火爲血肉陽九百六適當斯時苻堅石勒大業廣明五季之敵不如是之極也人情甚不美重爲風俗所移幸敵樂禍勇鬪嗜殺其勢不自相魚肉舉六合而墟之不止也邱往赴龍廷之召億兆之命懸於好生惡死之一言誠有之則雖馮瀛王之對遼主不是過從是而後黃冠之人十分天下之二聲燄隆盛鼓動海岳雖兗暴鷲悍甚愚無聞知之徒皆與之俱化銜鋒茹毒遲迴顧盼若有物掣之而不得逞父不能召其子兄不能克其弟禮義無以制其本刑罰無以懲其末所謂全眞家者乃能救之蕩然大

不收之後殺心熾然如火聚力爲撲滅之嗚呼
豈非天邪六月十六日前進士河東元好問記